

CARTA JEE NI TEE APOSTOL SAN PABLO NUU ÑAYUU ÑUU COLOSAS

¹ Máá rí cúu Pablo, apóstol Jesucristo, chi súcuan ni nujnahan ni Yaā Dios ni tají yá ruhū. Te jíín hermano yō Timoteo

² cátee rí carta yáha cuájeē nuū rohó ñáyuu ñuu Colosas, jeē cácuu ró ñáyuu maá yá jeē cá candíje vāha nuū Cristo. Te cáñuhun ni rī jeē Tatá yō Yaā Dios na sáha ga yā jeē vāha rōhó, te sáha ya jeē coo ndeyí coo sīi ni rō.

Jeē jicán tahu Pablo jehē ñáyuu cá candíje

³ Te jeē cájicān tahu rī nuū Yaā Dios, Yaā cúu Tatá maá Jítoho yō Jesucristo, te ní ní cánacuatáhú rí nuū yā jeē siquí rohó jíjnáhan ró.

⁴ Chi ni cajini jnūhun rí ndese vāha cá candíje ró Cristo Jesús, jíín ndese cá cundáhú ni rō tāca ñáyuu maá yá.

⁵ Chi cáñuhun ni rō nihīn rō jeē ñūhun vāha nde andiví cuu ró. Chi ná ni cajini ró jnūhun ndaā jeē jnáma ya rohó, te ni caquejéé ró ñūhun ni rō.

⁶ Te jnūhun un jéē ní canacani nuū rō, chi ndúcuehē cuahān te níhín jníñu ní cáhnu ñayiví. Te suni súcuan ni sáha jíín rōhó jíjnáhan ró ndé quiiví ní cajini ró te ni cajecūhun ni rō jeē ndaá cúu jeē yóhyo vāha ni Yaā Dios jíín ró.

⁷ Te jnūhun un cúu jeē ni stéén Epafras nuū rō, tēe sájniñu jíín rí jeē maní rī jíín. Chi cúu de tēe jéjníñu squícu vāha nuū Cristo jeē ndíto de rōhó.

⁸ Te máá de ni castūhun núū rī siquī rohó, ndese cákundáhú ni rō jnáhan ró sáha máá yá.

⁹ Jeē yúcuān suni tu cájecuīñī rī jeē cájicān tahu rī jehē rō, nde quivī ni níhīn rī jnūhun ún te nde vijna. Te cájicān rī nuū yā jeē na jécūhun vāha ni rō te coo ndíchí ró jíin jnúhun ya, sáha máá Espíritu, návāha cuni rō ndihī ndese nújnahan ni máá yá.

¹⁰ Te cájicān rī jeē caca ndaā rō nájnūhun cánuú caca ró jéē cácuu ró ñáyuu máá Jítóho yō. Te súcuān te sáha ró ndihī jeē nújnahan ni yā, te nihīn jniñu ró jíin táca jniñu vāha, te jecūhun ga ni rō ndese Yaā cúu Yaā Dios.

¹¹ Te cájicān rī jeē cuáha ya fuerza ini rō, nájnūhun iyó fuerza máá yá jeē cujéhnū luu ya. Te súcuān te cuu cuandeyí ni rō jíin táca-ni jnūndóho, te cusī teyí ni rō.

¹² Te cuu nacuatáhú ró nuū Tatá yō, chi máá yá ni chihī fuerza yohó jéē ñn cáhnu-ni jíin táca ñáyuu máá yá nihīn yō tahu yō. Chi cájica yó jíin luz yā jeē yíhi yó ndaha ya.

¹³ Chi ni jnama ya yohó jéē ni yíhi yó ndaha máá jéē jni poder nuū néē, te ni squivī ya yohó ndaha Séhe ya jeē maní yā jíin, ndácu ya jniñu nuū yō.

¹⁴ Chi Séhe ya un ní jnama ya yohó jéē ni jíhī yā jehē yō, te ni ine cáhnu ni yā nuū cuéchi yó.

Jeē ni sáha Cristo jeē ní ndiví yó núū jnúhun maní Yaā Dios jíin yó

¹⁵ Yaā Dios jeē tu cúu coto yó, ni sáha ya jeē ní quiji Séhe ya, te súcuān ni jito yó máá yá. Te Séhe ya ún, je iyó yá nde ná tu jecōo táca jéē iyó.

¹⁶ Chi jíin Séhe ya ni sáha Yaā Dios ndihī jeē ni jécōo, ndihī jeē iyó andiví jíin jéē iyó ñayiví, jeē jiní

yō nuū jín jéē tu jín yō nuū. Te suni ni sáha ya tācá ndajéhé jeē cándacu jniñu, jín jéē cándiso jniñu, jín jéē cácujuhnu, jín jéē cájni poder. Jín Cristo ni sáha Yaā Dios jeē ni jécōo ndihí, te jeē cúu Cristo cúu.

17 Te je íyó Cristo nde ná tu coo ndihí jeē iyó. Te ndaha máá yá yíhi vāha ndihí-ni.

18 Te máá yá cújéhnu nuū ñáyuu cácdíje, nájñuhun cújéhnu xinī nuū yiquí cúñu, chí nájñuhun yiquí cúñu yā cácuu í, cúu jeē ñn na cúu í jín yá. Te máá yá sáha jeē cotecu í ní cáni, te xīhna gā maá yá ni natecu mēhñu ndíyí, návāha cujéhnu ya nuū tācá-ni.

19 Chí ni cusí ni Yaā Dios jeē ndihí ndese cúu máá yá, suni súcuan cúu Cristo.

20 Te síquí jeē ni jíhí Cristo, te ni cusí ni Yaā Dios sáha ya jeē ndívicoo tācá-ni nuū jnúhun maní yā jín, tāca jéē yúcu ñayíví jín jéē yúcu andíví. Chí jín jéē ni jíhí Cristo jíca cruz, te ni sáha Yaā Dios jeē ndívicoo tācá-ni nuū jnúhun maní yā jín.

21 Te máá ró jijnáhan ró, chí sín síquí ni cahín ró ndé saá, te ni cajito uhū rō yā ini anuá rō, chí máni jniñu néé ní casáha ró. Te vijna chí je ni sáha Yaā Dios jeē ní ndívicoo ró núu jnúhun maní yā jín ró.

22 Súcuan ni sáha ya síquí jeē ni sócō Cristo maá yá ni jíhí yā, návāha coo ndoo coo í rō cuiñi ró núu yā, te ma cóo jnéhén ró, te tú na cuēchi coo síquí rō.

23 Te súcuan sáha ya núu cuiñi níhin ró jéē candíje vāha ró, te núu quendōo níhin ró jín jnúhun vāha jeē cáñuhun ni rō jeē jnáma ya rohó, te ma siaá cuiñi rō. Chí jnúhun un ní cajini ró, te ni jite núu ní cáhnu ñayíví. Te ruhū Pablo suni jéjníñu ri jeē nácani ri jnúhun ún.

Jeē jejniñu Pablo siquī ñáyuu cá candíje

²⁴ Te vijna te cúsi ni rī jeē ndóho ri jehē rō jijnáhan ró. Chi jíin yiqui cúñu rī ndóho ri jeē cúmanī gā ndoho ri jíin Cristo jehē ñáyuu cá candíje, suu ñayuu cúu nájñuhun yiqui cúñu yā.

²⁵ Te cúu ri tēe jéjniñu siquī ñáyuu cá candíje, chi súcuan ni tejniñu Yaā Dios ruhū, návāha nacani ndihī ri jñuhun ya nuū rō te quendōo vāha ró.

²⁶ Te nácani ri jñuhun ya jeē ní yisāhí, jeē tu ní cájini ñayuu nde jenahán ndasí te nde ní cáni vēji. Te vijna te je ni steén cají yá jñuhun un núu ñáyuu maá yá.

²⁷ Chi ni cusī ni yā jeē steén yā nuū i ndese cúcúca ndasí i jíin ndihī jeē ndíso jñuhun sāhi yáha jéē lúu cújéñu, te cuitē núu quihīn nuū tācá nación jeē tu jíiní. Te jñuhun sāhi yáha cúu jeē ndeé Cristo iní anuá rō, ndúú yá jíin ró, te jeē yúcuan cáñuhun ni rō tāca jéē lúu jéñu jeē coo.

²⁸ Te jñuhun Cristo un cúu jeē cánacani ri, te cástíhví ni rī tāca ñáyuu, te cástéén rī jñuhun ya návāha jecūhun vāha ni i. Te súcuan te ije vāha ni ndivii i jeē yíhi i ndaha Cristo Jesús.

²⁹ Te siquī yúcuan cúu jeē sájniñu ri, chi ndíhví ni rī nácani ri jñuhun jíin táca fuerza Cristo jeē chindéé ñájñahan ya jíin rí.

2

¹ Chi cúní rī jeē na jécūhun ni rō ndese yōhyo ndúcú ndeyí rí jehē rō, jíin jéhe ñayuu ñuu Laodicea, jíin ndé tāca ñáyuu jeē tu ní cájini cuiti nuū rī.

² Chi cúní rī jeē coo ndeyí ni anuá i, te inuú-ni coyūcu mánī i, te jecūhun ndihī ni i ndese yōhyo

cúcá i jíin jnúhun jeē candíje nīhin i. Chi cuni i ndese Yaā cúu Cristo, chi máá yá cúu jnúhun Yaā Dios jeē ni yísāhí un.

³ Te ini Cristo yísāhí tāca jnúhun jeē cucúcá ró jíin, suu jnúhun ndíchí jíin jnúhun jécūhun ni.

⁴ Te jnúhun yáha cáhán rī jíin ró jijnáhan ró, návāha ma stahú ni ñn i róhó jíin tāca jnúhun stáhú jéē lúu cáhán.

⁵ Chi vēsú ndeé jíca rí jíin ró, te ñúhun ni rī rohó, te cúsi ni rī jeē jiní rī ndese cájica ndaā rō te cácandíje nīhin ró Cristo.

⁶ Núu súcuan te nájnūhun ni cajetáhú ró jeē Jítóho rō cúu Jesucristo, suni súcuan na cáca ndaā rō jíin yá.

⁷ Te na jñí vāha jnúhun ya ini rō, te na íje vāha ró jíin jnúhun cácandíje ró yá, nájnūhun je ni cajini rō. Te níni nacuatáhú ró nuū Yaā Dios.

Jeē ndújeé yó sáha Cristo

⁸ Coto má cuāha ró jnúhun jeē stahú ni ñn ñayuu rohó jíin jnúhun ndíchí jéē tu jéjníñu, jíin jnúhun ndúxí stáhú. Chi tu cácandíje i jnúhun Cristo, chi sa cácandíje i tāca jéē tajnúni ñayuu, modo jeē castéén ini ñayivi yáha.

⁹ Chi ndíhi ndese cúu máá Yaā Dios, suni súcuan cúu Cristo.

¹⁰ Te ndíhi ndese cúu Cristo, suni súcuan cúu ró jijnáhan ró, chi cáyíhi ró ndaha ya. Te máá yá cújéhnú nuū tāca jéē cújéhnú jíin jéē ndíso jníñu andíví.

¹¹ Te siquí jeē cáyíhi ró ndaha ya, suu cúu jeē nájnūhun ni cuu ró circuncidar. Te jeē súcuan ni sáha ya circuncidar rohó, chi nasúú ñn jnuní jeē yíhi yiquí cúñu rō cúu, chi sa suhva jeē ní sándoo

ya tāca cuéchi ni casáha ró jíin modo neé máá ró. Chi súcuan cúu jeē sáha Cristo circuncidar rohó.

¹² Te jeē ní cajendute ró cúu nájnūhun jeē ní quindūji ró jíin Cristo, te suni nájnūhun jeē ní natecu rō jíin yá. Chi ni cacandíje ró jéē jíin poder Yaā Dios ní nastécu yā Cristo mēhñu ndíyi.

¹³ Chi ni cacuu ró nájnūhun ndíyi nuū yā síquī cuéchi ró, chi ná tu sáha ya circuncidar anuá rō nde saá. Te vijna te ni sáha Yaā Dios jeē cotecu rō ní cáni jíin Cristo, chi ni ine cáhnu ni yā nuū tāca cuéchi ró.

¹⁴ Te nájnūhun jeē iyó ñn acta jeē jicán cuéchi síquī yō jeē ni stívī yó ley yā. Te ni ndahva yā acta un, chi ni chunaa Cristo cuéchi yó jéē ni jíhī yā jicā cruz.

¹⁵ Chi ná ni jihī yā jicā cruz, te ni quende yā ndíhi poder tāca jéneé jéē cácujuhnu jíin jéē cájnií poder. Te ni quende yā jeē tuá cujuhnu, chi ni sáha ya jeē cuángoo nuū quíndihyū, te súcuan ni steén yā poder yā.

Na ndúcú yó jeē quéndōo vāha yó ndé andiví

¹⁶ Núu súcuan te ma cuatáhú ró núu cácahān ñayuu cuéchi síquī rō, síquī ñn jeē yéji rō chí síquī ñn jeē jíhi ró, chí jéē tu née ñ rō quiví víco jíin quiví núcosō yoō jíin quiví ndétátú.

¹⁷ Chi tāca ley síquī un ní jejniñu máá ndé ná tu quiji Cristo. Te vijna te ni quiji ya te tuá jíni ñúhún tāca ún.

¹⁸ Ma cuáha ro jnúhun jeē cási ni ñn ñayuu jeē nihín rō tahū rō. Chi cáchiñúhún i tācá ndajéhé yā, te cácahān i jeē súcuan cásaaha suchí i máá i. Te cácahān i jeē cájini ndije i jeē iyó ndáā jnúhun

cánacani i, te tuú. Te súcuan cásáha téyí sáá-ni i máá i, chi cájeni néé ni i.

¹⁹ Te tu cáhīn i jīn Cristo, Yaā cujéhnū nuū ñáyuu cácuu nájnūhun yiqui cúñu yā chi ĩn na cúu i jīn yá. Chi máá yá scuéhnu ya i jīn jnúhun ya, te nduu ĩnuú ni tācá i jeē cáhije i cuahān i, nájnūhun ni jeni ni Yaā Dios.

²⁰ Núu súcuan te nájnūhun jeē je ni cajihī rō jīn Cristo, cúu jeē ní casiáá rō tāca jéē tajnúni jeē castéén ĩni ñayīví. Núu súcuan ħte naun cásáha ga rō nájnūhun cásáha ñayuu ñayīví jéē jéndije ró tāca jéē tajnúni i?

²¹ Chi cácahān i: Ma quehé ró ma cáji rō jeē yáha chí jéē yúcuan, ni ma jní ró, áchí i.

²² Te máni jeē tajnúni ñayuu jīn costumbre maá i cúu te tu níhín jníñu jeē quéndōo ndaā ñayuu.

²³ Te ndaā chi cájeni ni i jeē jnúhun ndíchí cúu ún, chi sáha jīn i jeē chiñúhún níhin i, jīn jéē sáha suchí i máá i, jīn jéē stóho i yiqui cúñu i. Te tu níhín jníñu cuiñi jeē casi tācá jniñu néé jéē cuní i sáha i.

3

¹ Núu súcuan te nájnūhun ni natecu Cristo, suni súcuan ni canatecu rō jeē ní cuu ró nájnūhun ndīyí ni sáha cuēchi ró. Te na cóndihví ni rō síquī tāca jéē iyó andiví núū ndeé Cristo lado váha Yaā Dios nuū cujéhnū ya.

² Te na cáni ni rō síquī tāca jéē iyó andiví, nasūu síquī jeē iyó ĩni ñayīví.

³ Chi nájnūhun je ni cajihī rō jīn Cristo, te vijna chi nájnūhun cátecu rō jīn yá andiví, chi cáyihí ró ĩni ndaha Yaā Dios.

4 Te quiv̄i ndíji Cristo, Yaā sáha jeē cótecu yō ní cání, yūcuán na te suni quendacoo ndijin maá ró jíin yá, te kujéhn̄u luu ró jíin yá.

Ñayuu jíca jíin modo cuní maá, jíin ñáyuu ní ndujeé

5 Núu súcuan te casi rō tāca modo cuní maá ró jeē cáh̄iyo ró ini ñaȳiv̄i yáha. Chi ma cáca jnéni ró, ma sáha ró jniñu jnéhén, ma ndíyo ni rō sáha ró táca jniñu néé, ma cutóó ró, ma ndíyo ni rō ndajniñu. Chi tācá ndajniñu jeē ndíyo ni yō cúu nájnūhun ídolo yō jeē chiñúhún yó.

6 Chi siqūi tācá jniñu yáha cúu jeē cuāha Yaā Dios castigo xeēn nuū ñáyuu n̄hni ni nuū yā.

7 Te suni jíin jniñu yáha ní cajica ró ndé saá, ná ni casáha ró súcuan.

8 Te vijna te na stóo ró táca jéé yáha: jeē quití ni, jeē xeēn ni, jeē sáha jniñu néé, jeē cahán ndevāha nuū jnáhan, jíin jéé cahán tāca jnūhun tú vāha.

9 Ma stahú ró jnáhan ró, chi yūcuan cúu modo maá ró jeē ní cajica ró jíin ndé saá, te je ni castóo ró.

10 Te ni canduu ró ñáyuu jeé, cuandacu ró máá Yaā ni sáha rōhó, te cuajecūhun vāha ni rō ndese Yaā cúu ya.

11 Te ñayuu ní ndujeé tuá cúu i ñayuu griego, ni ñayuu hebreo, ni ñayuu ni sáha circuncidar, ni ñayuu tu ní sáha circuncidar, ni ñayuu ñuu jíca, ni ñayuu yucú jeē ní indāa néé, ni mozo jeē ní jeen ñayuu, ni ñayuu sájniñu cuenta maá, chi inuú cúu ndih̄i i nuū yā. Chi Cristo cúu Jitoho ndih̄i i, te ndéé yá ini anuá ndih̄i i, ndúú yá jíin i.

12 Chi ni nacāji Yaā Dios rohó jíjnáhan ró jeē cúu ró ñáyuu maá yá jeē maní yā jíin. Núu súcuan te

níní cundáhú ni rō jnáhan ró, te coo vāha ni rō jíin jnáhan ró. Te coo suchí ni rō, te coo vītá ni rō, te coo paciencia ni rō.

¹³ Cuandeyí ni rō jíin jnáhan ró, te cone cáhnu ni rō nuū i te núu na vé ni sáha i nuū rō. Chi nájnūhun ni ine cáhnu ni Cristo nuū rō, suni súcuan sáha máá ró.

¹⁴ Te jeē cánuú gá cúu jeē cundáhú ndasí ni rō jnáhan ró. Chi yūcuan sáha jeē ndúu inuú ni rō te íje vāha ni rō jíin jniñu vāha.

¹⁵ Te jnūhun coyūcu mánī na cúnuú ini anuá rō sáha Yaā Dios. Chi ni cana ya rohó jéē nduu ró ñn na ñayuu jéē cóyūcu mánī rō. Te níní na nácuatáhú ró núu yā.

¹⁶ Te scuáha vāha ró jnúhun Cristo návāha cunuú jnúhun ún ini anuá rō. Te stéén rō nuū jnáhan ró, te stáhví ni rō i jíin táca jnúhun ndíchí yá. Te jíin salmo jíin himno, yaa ñi jeē cahán jnūhun ya, na cáta luu ró jéē nácuatáhú ró ini anuá rō nuū Yaā Dios.

¹⁷ Te tācá jniñu sáha ró, núu jeē cahán rō chí jéē sáha ró cúu, ndihí na sáha ró jéē ndujéhnu síhví máá Jítóho yō Jesús, te nacuatáhú ró núu Tatá yō Yaā Dios sáha ya.

Ndese cánuú squícu ñayuu cá candíje nuū jnáhan i

¹⁸ Róhó ñahan cácuu ñasihí, cuatáhú ró nuū yíi ró, chi súcuan cánuú sáha ró síquī jeē candíje ró Jítóho yō.

¹⁹ Te róhó téé cácuu yíi, cundáhú ni rō ñasihí ró, te ma cútucu ni rō jíin ña.

²⁰ Róhó séhe jíjnáhan ró, tācá-ni jniñu cuandíje ró núu tatá rō nuū naná rō, chi súcuan cúshí ni maá Jítóho yō.

²¹ Te róchó tátá jijnáhan ró, ma squití ni rō sēhe ró, návāha ma cucuíhyá ni i.

²² Róchó mozo jijnáhan ró, tācá-ni jniñu cuandije ró núū patrón rō ñayīvi yáha. Ma sájniñu ndúxí ró jeē maá jéē coto de te cuajnúhún de róchó. Chi na sájniñu ndaā sájniñu ndije ró, te conso īyo ró núū Yaā Dios.

²³ Te tācá jniñu sáha ró, na cúsī ni rō sáha ró, te na cáni ni rō jeē nuū Jítóho yō cájejniñu ró, nasūu núū ñáyuu.

²⁴ Chi je cájini rō jeē maá Jítóho yō cuāha ya cuehē tahū cuu ró ñí cáni. Chi nuū maá Cristo cájejniñu ró, chi máá yá cúu Jítóho rō.

²⁵ Te ñáyuu casáha jniñu néé, chi sa suhva ndu-tahū i siquī jeē ni sáha i. Chi tu sáha Yaā Dios cuenta ndese cúu ññ ñáyuu, chi inuú sáha ya jíin i.

4

¹ Róchó patrón jijnáhan ró, vāha ndaā na sáha ró jíin mozo rō. Te na núcūhun ni rō jeē suni íyó Jítóho maá ró, Yaā ndeé andiví.

² Te ndivii rō ma jécuiñī rō jeē jicán tahú rō, chi coo ndito ni rō jíin, te nacuatáhú ró núū Yaā Dios.

³ Te suni cacān tahú rō jehē rī jijnáhan ri, jeē na sáha Yaā Dios jeē cóo ga modo nacani ri jnūhun, návāha cuu cahān rī jnūhun Cristo jeē ní yisāhí, jeē tu ní cájini ñáyuu jenahán. Te siquī jnúhun un cúu jeē íne rī vecāa.

⁴ Te cacān tahú rō jeē cuu cahān cají rí ndese cánuú cahān rī.

⁵ Sáha yúcún váha ró jíin ñáyuu tu cá candíje. Ma cúhuun ni rō siquī i, chi condihvī ni rō scandíje ró i.

⁶ Te máni cahān vāha ró jíin ñáyuu, te cahān rō jnūhun cuajniñu jeē quéndōo vāha i sáha. Te cani ni rō ndese vāha nastió cuíñi rō jnūhun nuū ñin ñin i.

Saludo jeē sándihí

⁷ Tíquico cúu ñin hermano jeē maní yō jíin, te tē squícu vāha chindéé ñájnáhan jíin rí cúu de, te jéjniñu de jíin rí nuū maá Jítóho yō. Te máa de castūhún ndihi nuū rō ndese cuahān jniñu ri.

⁸ Jeē yúcuan ní tají rí de cuajeē de nuū rō jijnáhan ró, návāha cuni rō ndese cáhīyo ri jíin jniñu, te coo ndeyí ni rō sáha de.

⁹ Te suni cuajeē Onésimo jíin de, tē cúu jnáhan máa ró jijnáhan ró. Te cúu de hermano jeē squícu vāha jeē maní yō jíin. Te ndindúú de castūhun núū rō ndese cuahān tācá jniñu ichi cháha.

¹⁰ Sándeyí ni rō jijnáhan ró, áchí Aristarco, tē íne jíin rí vecāa. Te suni súcuan cáhán Marcos, ñani primo Bernabé. Te je ni ndacu ri jniñu nuū rō siquí Marcos, te núu ni jecondēhé de róhó te sáha vāha ró jíin de.

¹¹ Te suni súcuan cáhán Jesús, tē jeē suni nání Justo, jeē sándeyí ni rō. Te máa-ni de cácuu tē hebreo cácandíje jeē chindéé ñáhán cánacani jnūhun jíin rí siquí ndese ndácu Yaā Dios jniñu. Te yōhyo ndeyí íyó ni rī casáha de.

¹² Sándeyí ni rō jijnáhan ró, áchí Epafras, tē cúu jnáhan máa ró, te mozo Cristo cúu de. Te níni jícán tahu ndasí de jehē rō, jeē na cuíñi nīhin ró, te ije vāha ni rō jeē squícu vāha ró ndihi jniñu cúní Yaā Dios.

¹³ Chi cáhán ndaā rī jeē yóhyo ndíhví ni de jehē rō jijnáhan ró, jíin jéhē ñáyuu ñuu Laodicea jíin Hierápolis.

¹⁴ Lucas, tēe cúu médico jeē maní yō jíin, suni cáhán de jeē sándeyí ni rō, te suni súcuan cáhán Demas.

¹⁵ Cachi rō nuū tācá hermano ñuu Laodicea jeē sándeyí ni i, áchí rí. Te suni súcuan cahān rō jíin Ninfas, jíin táca ñáyuu cácadíje cándutútú vehe ña.

¹⁶ Te ná ni jíinu ni cacahu ró carta yáha, te suni tají ró na cáhu ñáyuu cácadíje ñuu Laodicea. Te suni cahu máá ró carta jeē cuahán nuū ñáyuu Laodicea te ndiji nuū rō.

¹⁷ Te cachi rō nuū Arquipo jeē na ndúcú ndéyí de squícu de jniñu ní tee Jitoño yō síquī de, áchí rí.

¹⁸ Ruhū Pablo, yāhá-ni cúu jeē tēe rī jíin ndaha máá rí, jeē sándeyí ni rō. Te nucūhun ni rō ruhū jeē íne rī vecāa. Te ñúhun ni rī jeē na sáha ga Yaā Díos jeē váha róhó jijnáhan ró. Súcuan na cóo. Amén.

Nuevo Testamento en mixteco
New Testament in Mixtec, Atatláhuca (MX:mib:Mixtec,
Atatláhuca)

copyright © 1973 Wycliffe Bible Translators, Inc.

Language: Mixtec, Atatláhuca

Translation by: Wycliffe Bible Translators, Inc.

Mixteco, Atatláhuca [mib], Mexico

Copyright Information

© 1973, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Atatláhuca

© 1973, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 5 Apr 2025 from source files
dated 29 Jan 2022
9665e546-39d0-5bd5-8b10-38916a94951f